

## **Gada Caduff-Venzin, Camischolas**



Ella ei naschida ils 15 da schaner 1903 a Selva sco feglia dils geniturs Giusep Flurin Venzin e Maria Agatha, naschida Pally. Ensemen cun ses otg fargliuns ha ella passentau ina ventireivla affonza a Selva. Suenter las scolas dil vitg ha ella luvrau en differents hotels, aschia a Sumvitg, Ursera ed en Tujetsch.

Ils 17 da fevrer 1927 ei stau di nozzas cul giuven Gion Giachen Caduff da Rueras. Els ein secasai a Camischolas. Dieus benedescha la letg cun dudisch affons, quater buobas ed otg buobs. Quels portan bia legria, denton era bia lavur e quitau.

Memia baul ha la mort dil car bab e mariu, igl onn 1945, tuccau l'entira famiglia. Igl ei buca stau lev da lezs onns per la Gada da trer si ina aschi numerusa famiglia. Grevas cruschs per la mumma ein era stadas la sperdita d'ina feglia ella vegliadetgna da 4 onns ed in fegl da 21 onn.

Igl onn 1984 sto ella serender ella casa da vegls s. Vigeli. Leu sa ella passentar ina biala sera dalla veta. In accident e dimora el spital spossal las forzas ad ella. Senza selamentar e cun gronda pazienza supporta ella era quei destin. Ils 25 da fevrer 1992 ha il Segner liberau ella da ses mals e clamau sia fideivla survienta a casa en siu reginavel. Ella ruaussi en pasch.